

TELE ARUBA PART TWO

ORANJESTAD(AAN) E asunto di duna credito na Tele Aruba no a caba ainda pasobra awe DIARIO ta sigui duna credito na esnan den Tele Aruba, cu a muestra un falta di respet y actitud di mala fe door di bay kere cu nan por lastra DIARIO inhus-tamente.

Manera cu DIARIO a publica den e edicion di diasabra ultimo, Tele Aruba su periodistanan di awa dushi cu tanto tabata colga na telefon cada biaha pa asina haya informacion di DIARIO, pa nan tambe por tabata tin material pa nan pasa den nan noticieronan, nunca a duna DIARIO ni un biaha credito pa tur loke nan a haya di DIARIO.

Redaccion di DIARIO nunca a pidi pa haya credito di Tele Aruba pasobra nos ta ripiti un biaha mas: ningun canal di television o radio emisora ta competencia pa DIARIO!!!

E director di Tele Aruba señor Demetrio Maduro cu ta responsabel pa loke e canal aki ta transmiti y tambe Christina cu ta responsabel pa nan noticieronan, a lubida cu ora cu na ta critica encuanto di credito cu nan no a haya, nan no a menciona dianan cu Tele Aruba tabata piratia material di ATV, di transmisionnan di base ball y pasando e logo di ATV na Tele Aruba sin duna ATV credito pa loke Tele Aruba tabata hortando?

Pa sigui refresca memoria di esnan den Tele Aruba manera Demetrio, Christina, Ivo, Dino, Robert, Leo, Glenda, Jerney, Mary, Tito, Adeline etc etc, tempo cu hende tabata critica boso colega Colochi pasobra el a

feita su cabey, ta ken a defende Colochi, comparando e situacion cu e reportero di un canal di Venezuela cu tambe tabata tin su cabey feita y tambe reporteronan di canalnan na Merca?

Ki dia Tele Aruba a duna DIARIO credito pa sali na vanguardia di un colega di prensa cu a merece di haya sosten y defensa di un y tur, pero ta DIARIO so a para firme pe, ni Tele Aruba mes no a defende nan propio hendenan.

Tempo cu empleadonan di Tele Aruba tabata yora pasobra gobierno no kier a duna nan loke nan tabata merece na condicionnan di trabao etc etc nan a lubida ta unda nan a bay acudi?

E tempo ey si DIARIO tabata bon pa defende empleadonan di Tele Aruba y ki dia boso a bisa djs danki?

DIARIO tabata sinta warda riba un danki di boso? No esaki no tabata e caso pasobra DIARIO a haci su trabao manera cu pueblo tabata y ta custumbra di dje y nada mas.

No tabata falta mucho cu Tele Aruba tabata a punta di dal sera pa motibonan di pod-

ernan politico y ta ken a defende Tele Aruba pa awe e periodistanan di awa dushi di Tele Aruba por ta ganando nan placa tur luna?

Ivo Janes dilanti di camara a sinta cu e cara di Yo no Fui, pero riba caya e tabata kere cu e por bay reclama!!

"Ivo no sea hipocrita y tira piedra y sconde man; si bo tin algo di reclama haci esaki dilanti di cameranan di Tele Aruba manera cu bo otro coleganan a haci cu abo tambe para nan tras, pero scondi tras di cortina o para firme den bo sapato y bay reclama Jossey Mansur e director di DIARIO, cu tanto bo a critica publicamente cu su matutino a horta material di Tele Aruba sin duna Tele Aruba credito.

Ivo bisa awe den bo noticiero na Tele Aruba con bo ta cuestiona fuertemente e hortamento di material di Tele Aruba y menciona hunto cu Glenda, number di e matutino y menciona tambe number di e director di e matutino cu ta responsabel pa loke e matutino ta publica!!!

Glenda cu tanto mester a duna credito na e matutino

preferi di dje; e noticia cu tanto boso tabata gaba cu tabata un primicia y exclusivo; bo sa ta cua matutino a haci investigacion profundo riba e caso aki y te hasta na Venezuela, pa siman pasa bo por a bay gaba bo canal di television y bo matutino preferi?

Awor Glenda ta unda bo ta bay sigui propaganda bo programa di Purba den Bo Cushina?

Bo ta kere cu abo y Tele Aruba por sigui propaganda bo programa di purba den Cushina robez den e matutino cu bo a critica asina tanto?

E madam cu peinado di palabruha; wak pa bo no cay mas cu bo auto den e canalnan cu tin na Pos Abao!!

Christina cu tur aña tanto tin un boca yen di prensa uni y cu e kier wak celebracion di prensa uni na Aruba; ta dje forma ey bo ta kere cu abo Christina ta bay uni prensa?

By The way ta unda e autonan di Tele Aruba cu a kibra a bay? Ta ken lo a cumpra nan na prijs di baca flaco?

E programa cu Tele Aruba tin planea pa mayan encuanto e rol di prensa na Aruba, por

acepta hendenan cu no ta duna credito?

Duna Ceasar loke ta di Ceasar; un hende cu te awe tabata para pa loke e ta kere aden y ta bisa cosnan manera cu nan mester ta; ta Carmichael "Colochi" Bikker!

Te cu ayera redaccion di DIARIO no a haya contacto cu Colochi pa asina haya su version di loke esnan di mala fe a haci y si e tambe ta para tras di esaki pasobra na prome instancia nan a bisa cu Colochi tambe ta den e weg, pero despues ta bin resulta cu Colochi no tabata na Aruba.

Jerney tambe a ser hinca den trampa pasobra nan a pushe cu un papel den su man, pa e lesa algo cu otro a hinca den otro, pero nan mes no tabata tin e curashi pa bay lesa loke nan tabata sa cu lo bay trece problema grafidi.

"Jerney si nan bolbe duna bo algo asina no cay den trampa di otro y laga Demetrio, Chritina, Glenda y Ivo mes bay lesa esaki dilanti di camara".

Ban wak awor ta ken ta para firme den nan sapato na Tele Aruba y ban wak ken por papia di credito!!

Turista di Argentina a worde gara

ORANJESTAD (AAN): Un muher turista a worde gara manera un pisca den taray. Esaki ta debi cu e muher di 42 aña procedente di Argentina, a drenta den e establecimiento "Juggling Fish".

Durante su paseo den e negoshi, e muher di inicial M.C.J.A.L. a worde atrapa pa e gerente. E muher tabata den su poder cantidad di bistir. Gerente a yama Polis, na warda Recherche a worde poni na altura, nan lo continua cu e investigacion. E caso aki a tuma lugar den ora trempan di mainta figurabo.

ESAKI TA UN MACHO!!

